



Senin, 08 Nopember 2021
Ogen: 1 Samuel 25: 32-33



Ngolangi Erbahan Jahat



Ketulusen ukurta banci tangkas teridah jadi kiniulin man kalak si deban terlebih si ndeher ras kita entah pe si i sekelewetta. I bas perukurenta si mehuli entah pe polos guna erban kiniulin, kepe banci jadi inspirasi nandangi kalak si deban guna ngelakoken si mehuli i bas kegeluhenna. Bage kepe belinna perulihen ukur si mehuli e. Jadi banci ka nge alu kita erbahan si mehuli, piah kalak si ndeher ras kita pe nerusken kiniulin e nandangi kalak si deban (penularan kebaikan).

I bas oratenta sendah Daud ngataken bujur nandangi Abigail si enggo njumpai ia. Kepe ope denga reh Abigail, enggo me isuraken Daud guna munuh dengen mbalas dendam man Nabal. I bas ayat 22 isuratken *"Dibatalah si munuh aku adi la kin ku bunuh kerina kalak ah ndai keru ope denga erpagi-pagi."* Tapi, ban nggo idahna Abigail, sura-sura si ndai enggo lesap i bas ukurna nari. Sabap Abigail e me sekalak si mehuli ukurna, sekalak si sedekah enda berinisiatif muat ukur kalak si enggo isakiti perbulangenna Nabal. Emaka, Daud selaku kalak si erkiniteken nandangi Tuhan meteh maka si e kerina bekas pengaturen Tuhan guna kiniulin dirina. Tuhan ngaturken Abigail reh ndahi ia. Alu bage susur me sura-sura si la uli ndai salih jadi si mehuli, e me ngalemi Nabal.

Sura-sura manusia erbalas i bas kerina kejahatanen si seh bana rusur turah i bas pusuh, tapi pernah ka nge kita megermet maka la pernah ibereken Dibata man banta kesempatan guna mbalasken kesalahen kalak si deban man banta? Lalap nge ibahan Dibata dalanna maka kita erkuah ate man kalak si deban, entah alu cara lit teman si ngapuli pusuhta, entah pe alu kita mpegegehi banta alu pertotonta seh maka kita ngasup ngalemi salah temanta. Bahkan erbage kepe bas ndalani kegeluhenta enda. Emaka bujur ninta man Tuhan olangina kita erbahan si la mehuli.